

strinæ, itemque Patavinæ ad Medoaci in oppidum influxum præfecturas, alteris per annos quindecim, alteris quoad eorum major natus viveret, & uni virgini dotem civitas dono dedit. Reliquis triremium præfectis, qui Methone capti eodem impetu fuerant, seque pecunia redemerant, Alexandro Gotio Corcyrensi, in ea insula magistratus: Nicolao Cucaro Hydruntino, in sua urbe item magistratus, & auri libra unciamque septem annuæ; Jacobo Balbo Parenfi, auri itidem libra unciamque. Item singulis omnium tributorum immunitas attributa: præmia insuper in complures vivos, qui se fortiter atque amanter gesserant, ex Pisauri literis honorifice collata: dataque lectis ad id magistratibus cura, ut Methonensium, quibus quidem aut parentes aut fratres, aut liberi pro republica interfecti fuissent, qui Venetias venissent, causas cognoscerent, deque eis ad Patres referrent, ut pro cuiusque incommodis & jacturis a Senatu sarcirentur, aut omnino sublevarentur. Latum præterea de Naupliis, uti eis, bello confecto, immunitas per annos decem concederetur: domusque eorum, quas ipsi dirui permisissent, ut oppidum communitius fieret, reipublicæ pecunia restituerentur.

His rebus domi forisque administratis, Cæsar Alexandri filius, cui paulo ante a republica petente patre cum jure comitiorum civitas data fuerat, puellam ex Elisabetæ Metaurensem reginæ famulatu, ad Carratium reipublicæ militibus præfectum, cui erat nuptui tradita, proficiscentem, medio inter Ariminum Ravennamque itinere, missis Cesena suis equitibus, vi rapuit, comitatu ejus pulso, vulneratis compluribus. Ejus ille oppidi paucis ante mensibus regnum obtinuerat, Alexandro tradente, tum Pisauri atque Arimini republica ægre illa quidem, quod ad Ariminum attinet, ac pene subinuita, sed tamen ut perpetuis Alexandri postulatis precibusque satisfaceret, una cum Aloisio rege Galliæ, qui suas ei copias iterum dederat, annuente atque permittente. Ea erat puella miræ pulchritudinis. itaque amore incensus adolescens, cum pretio aut precibus assequi se se posse nihil videret, sumptis a novo regno

ani-